

25. September 2017

Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaat nr. Xx,xx,Xxx 2017-imeersaq.

(Aningaasaqarnermut Akileraartarnermullu Naalakkersuisoq)

Pigisanit pissarsiat ilaasa akileraaruserneqartarnerat pillugu Inatsisartut inatsisaat nr. Xx,xx,xxx 2017-imeersaq.

(Aningaasaqarnermut Akileraartarnermullu Naalakkersuisoq)

Siumumiit inatsisissatut saqqummiunneqartut marluk, ataatsimoortillugit oqaaseqarfigissavagut. Siullermik oqaatigissavarput, ajuusaarnaraluartumik aasaanerani tusarniaaneq ingerlanneqarmat, tamanna tusarniaaffigineqartunit kipiluttunarineqarsimanera Siumumiit maluginiaratsigu, paasisinnaallugulu.

Akileraartarnikkut aaqqissuusseqqinnerit, taamaaqataalluunniit ilisimaneqartutut annikitsuuneq ajorput. Taamaattumillu inuiaqatigiit attorneqartussat peqataatilluinnarnissaat, Siumumit pingaartilluinnarparput, pingaartumik allannguutissat taama annertutigitiillugit, aammalu inuit amerlasuut aningaasatigut toqqaannartumik eqqorneqartussaatiillugit.

Siullermik tusarniaassutaasunut akissutini, tamaasa ataasiakkaarlugit pingikkaluarlugit, maluginiarparput, arlalinnit inatsisissat pineqartut "paasiuminaatsinneqartut" aammalu kingunissaannut tunngasut isumakuluutigineqartut. Tamannalu Siumumiit paasilluarparput, uaguttaaq isumaqaratta apeqqutit arlalissuit, aammalu inatsimmi aalajangiisunut ilaagaluit, ersarissumik qulakkeerneqartumillu inissinneqarsimannngitsut, tamannalu isumakulunnartutut oqaatigissavarput.

Nunatsinni ukiorpassuarni ileqquusimannngilaq, soraarnerussutisiaqalernissamut ileqqaartarneq, tamanna pissuseq nutaakannersutut taasinnaavarput. Taamaattorli aamma pigisanit iluanaarutit taamatut oqaatigineqarsinnaapput. Uanilu akileraarutitut tagginneqartoq, tunngaviginiarneqartorlu 15,3 procenti, qanoq naatsorsuinikkut nassaarineqarsimannngitsut, paasissallugu soorunami soqutiginarpoq.

Naalakkersuinikkut pingaartilluinnarlugu inuiaqatigiit kaammattorneqartuarsimapput, utoqqalinissaminnut ileqqaarnissaannik, taamaasilluni siunissami soraarnerussutisiaqalernissamut inuiaqatigiit

kisiisa isumalluutiginigat, ukiut siuliini namminneq katersaminnik soraarninngorlutik inuussuteqarsinnaaniassammata, toqqissisimanartumillu isertitaqarlutik. Tamannalu maanna inatsisissatut siunnersuutigineqartunit sunniuteqarfigineqassaaq, pigisat nalilinniit, soraarnerussutisiat katersanit, aammalu inuunermik sillimmasersimanermut taamaaqataanullu tunngatillugit.

Siumumit isumaqarpugut, apeqqutit arlalissuit suli qulaajarneqartariaqartut, ilaatigut, inatsisissat uku pineqartut qanoq sunniuteqassappat, nunatsinni suliffeqarfinnut?, taakkumi aamma piginneqatigiissutinik, nalilinnik pigisaqarmata, aalisartitsileqatigiiffiit piginneqatigiiffiusut, suliffeqarfiit namminersortut, taakkulu piginnittuinut? Inuiaqatigiinnut qanoq naleqarsinnaanera sukumiisumik misissorneqarpa?, allaffissornikkut qanoq nukinnik atuiffiutigissava?

Kiisalu maannakkut ernummatigineqarsinnaanerpa, suliffeqarfiit taamaaqataasalu aningaasat nalillillu pigineqartut, nunanut allanut tamakku nuussaneraat, inatsisissat pineqartut sioqqullugit?.

Taamatut Siumumiit oqaaseqarluta, innersuussutigissavarput, ataatsimiititaliamut susassaqartumut, aappassaaneerneqartinnagu ingerlatissasoq.

Knud Kristiansen

Siumut.